

۱ ایلول ۱۳۲۷

پنجشنبه کونلری نشر اولور

نومرو ۲۶ - ۲۱ رمضان ۱۳۲۹

بالجمله محررات درسعات پوستخانه سنه
تصوف کوندر لیلیدر.



سنه لکی ممالک عثمانیه ایچون
۳۰ غروش و ممالک اجنبیه
ایچون ۷ فراقدر.

تصوف

صاحب امتیاز و سر محرری
اورفه مبعوثی

شیخ صفوت

مرکز توزیعی باب عالی جاده سنده
جمعیت کتبخانه سیدر

نسخه سی ۲۰ یاردر

التصوف کله آداب : ابوحنفص عمر بن مسلمه

عرفای امتک مقالات عارفانه لرینه تصوفک صحیفه لری آچیقدر

تصوفه متعلق میاحث شتادن باحث و مکارم اخلاق اسلامیتک تعمیمنه خادم مجله مغنویه در

بار عشق کیم تحمل ایده من ارض و سما
ناتوان کوکلم مجیدر آکا ماوا ایلدک

بیجه عارف جوهر اسراره مخزن اولسون
بیجه عاشق درد حجر عشقه مسکن اولسون
بیجه شانی بی سرو و بی جان و بی تن اولسون
بیجه یانوب روشنی عشقکله روشن اولسون
حسنکک عکسین رخ دلبرده پیدا ایلدک

اوراق وارده

عیناً

ای اخوان دین ! مطالعه سیله قریرالین اولدیغیمز
جریده تصوفی رسائل سائردهده مخبر حکایه لر کبی
اوقیوب اوراق پریشان آراسنه براقه رق مندرجاتی
نسیان ایتیم . بلکه بالدفعات دقت و نظر بصیرتله
اوقویلم و اوقودجقه متصح و متنبه اولم که بدایتی ضیق
و مشقت و نهایتی بادی حسرت و ندامت اولان بو دنیاده
نوجهله حرکت ایده جکمز و محل نعيم سرمدی اولان
آخرتک درجات عالیه سنی نه صورتله اله ایده بیله جکمز
بزه تعلم ایچون من طرف الله مأمور اولان حضرات
اهل الله : دنیا ظل زائل و نوم نائمدر آکا حرص ایله
ایله میل ایدنلر البته نادمدر . بنسای خراب ، شرابی
سرابدر . نعمتی تقمت ، صفائی کدر و محنتدر دیرک
بزه دائرة شریعتده راه هدایتی یعنی طریقتی کوستریورلر .
طریقت ایسه بزم اکثریتله کوروب و بلدیکمز کبی بر
طاقم عادات و مراسمدن عبارت دکدر . فی زماننا
لاجل الاکل تبدیل الشکل ایدن درویشلرک و بعض
شیخلرک خرقه و کمر و کشکول و تبر مثللو لباس
عظمت التباسلرینده آلدانیم اولا عبودیت ده اطوغروسى
اسلامیته لازم اولان علوم دینییه ای اوکرن دکدن صوکره
نفسلرینی صفات ذمیمه دن تزکیه و قیلرینی صور
علائقندن تصفیه و روحلرینی قیودات و اضافات شائبه
لرندن تخلیه ایدن حضرات صوفیه یه کردن داده تسلیم
اولم . زیرا آبدست آلمانجه نماز قلنماز کذلک شریعتسز

طریقت اولماز . نمازدن اول آبدستک لزومی کبی محضا
عبودیت مولادن عبارت اولان طریقت ایچون ده مرشد
اعظم صلی الله علیه وسلم افندمک (طلب العلم فریضة علی
کل مسلم و مسلمة) حدیث شریفی حکمنجه هر ایشدن
اول علوم دینییه یی تحصیل ایتک خصوصتک فرض
اولدیغنی بیله لم . کتب فقهیه یی اوقویلم اوقویلمده اساساً
ایکی قسمدن عبارت اولان احکام شرعییه یی اوکرنم .
قسم اول عقلاً و نقلاً اعتقادی واجب اولان احکام
یقینیه درکه بواحا کیمی تحصیل ایتکدن مقصد تصحیح اعتقاد
اولمغه بو قسمه احکام اعتقادیه و احکام اصلیه و اثباتی
کافل اولان علمدهده علم توحید و صفات تسمیه اولنور .
قسم ثانی عبادات و معاملات و عقوباته تعلق ایدن
احکام دینییه درکه بوندن دخی مقصد اصلاح اعمال اولمغه
کندوسنه احکام عملیه و احکام فرعیه و دلائل شرعیه
ایله بیاتی کافل بولنان علمدهده علم شرایع دینلور .
ایشته علوم و مسائل دینییه شو احکام جلیله یی حاوی
اولان ایکی بیوک و واسع علمدن عبارتدر . بونلری
بئک ایسه هر مؤمن و موحدک وظائف اصلیه سیندندر .
چونکه صاحب شریعت علیه اکمل التیجیه افندمن
حضرتلری شریعت بر آغاج و طریقت آنک دان
و بوداغی و معرفت یاراغی و حقیقت میوه سی اولدیغنی
بیان بیورمشدر . شو حالده شریعت اصل و طریقت ایله
معرفت و حقیقت فرع اولمش اولور . برشینک اصلی
اولمسه فرعی نرده بولنور . قطب ربانی و غوث
صمدانی حضرت پیر کیلانی قدس الله تعالی سره العزیز
افندمک (العلم منحصرة علی اربعة ابواب الباب الاول
علم الشریعة من الامر والنهی و سائر الاحکام و الثانی
علم الطریقة و الثالث علم المعرفة والرابع علم الحقیقة
فلا بد من تحصیل کلها) قول شریفی مدعای مذکورک
دلائل واضحه سیندندر . اللهم اجعلنا متصفین بالافعال
کما جعلتنا واصفین بالاقوال ووقفنا لحسن الادب و صالح
الاعمال آمین . محمد شاکر

• مطبعة ابو الضیا • مدیر مسئول : شیخ صفوت